

Dene gina köcökpa te Pawülü ba fü wü kpara ka Yesu agbü Tesalonika 1 Tesalonika

Masere si-ngü

Dene gina köcökpa te Pawülü ba fü wü *kpara ka Yesu Kurisito agbü Tesalonika. Pawülü ta de gina kpara te mala ngari Yesu fü wü kpara agbü Tesalonika kpala me-ye. Ah nü ta kpala de wü bu ye 'basu, wü Sila ake Timoteyo. (Mü ena amaka ngü la gbü buku ka wü Mürü Tima ka Yesu 17.) Te wü Pawülü mala ngari Yesu fü wü kpara ka Tesalonika la, fü mere bi ewü afü maguma wü, adu ara fü Yesu.

Amba Pawülü ngbü ta kpala teka fe biringbö nda de, angü wü gara wü di engä *Yisarayelee, te ewü ngbü de kpala, wüh yia liki engu agbü Tesalonika asidi. Angü wü di engä Yisarayelee la, wüh le ngü ka Yesu, te Pawülü ngbü emala kpala ne, nda-wü de. Angü Pawülü gü ba, "Mene wü kpara, te ewü ena ato maguma wü fü Yesu ne, Yesu ena aküwa ewü aküwa 'buru. Anga te ah de wü di engä Yisarayelee, anga wü *ganzi kpara, anga neh wü da, Yesu ena aküwa ewü 'buru." Ngü la siti eküte wü di engä Yisarayelee fa sü, angü nda-wü fingangü gü ba, "Me le wü ganzi kpara 'buru 'buru de. Ah nzö de ani, wü di engä Yisarayelee, ani ena aküwa 'duwa me-ani." Te di bala, fü ewü ayia aliki wü Pawülü

agbü Tesalonika kpala de gü. Fü wü Pawülü ayia anü angbü agbü gara sü de iri ye Atenayi.

Fü Pawülü angbü agbü Atenayi kpala de mere fingangü emagama ye, teka wü kpara de te ewü le ngari Yesu gömö ni ne. Angü ah ngbü kpala teka sikpi mba cükü'daye, dada te ah ena ari wü kpara dela, de ngari Me mbi mbi mbi bane ma. Ah wu kpah kpo, gü ba, "Wü kpara te ewü liki ni, wüh ena adu kpah ato cinga te wü kpara la." Pawülü le ta adu kpaka ewü kpala, teka ato wazi fü ewü, de wüh rü kpekpeke gbü ngü ka Me ne, amba ah maka kaje de.

Te di bala, fü Pawülü ayia atima Timoteyo agbü Tesalonika teka aceka ewü, de ah du, ah mala nga ewü fü ni. Te Timoteyo du koro, fü ah amala nga wü kpara la fü Pawülü, gü ba, "Wü vügü ka-ye agbü Tesalonika de kpala ne, ngbü eto cinga te wü kpara ka Yesu efa sü. Amba wü kpara ka Yesu la, wüh kpe cürü nda-wü de. Wüh ngbü erü fi bü kpekpeke gbü ngü ka Yesu."

Te Pawülü je ngü ka wü kpara la bala, fü ah angbü de mere tadu. Fü ah ayia aba köcökpa ne fü ewü, teka ato wazi fü ewü. Ah le kpah ari ewü de gara riri ka Me, te ewü je mbi mbi la de. Ah de ngü ka dudu ka Yesu, teka fü ewü angbü emere ngü, te ena areke gbü jia Me, zalü akoro di gbü sikpi, te Yesu ena adu akoro tete na. Te mü ena atanga ngü la enatikine, ah ena ato wazi kpah fü mü, agü kpah tamu wü riri ka Me fü mü fanü, fü mü amaka wazi gbü ngü la.

Wü ngü te mü ena amaka gbü 1 Tesalonika ne, wüh dene.

Sapita 1:1-3:13 Ngü ka wü kpara ka Yesu
 agbü Tesalonika
 te ngbü eto tadu fü Pawülü
 Sapita 4:1-12 Ngü te wü kpara ka Yesu ena
 adi emere
 Sapita 4:13-5:11 Ngü teka dudu ka Miri Yesu
 füh kotö ne
 Sapita 5:12-28 Adu riri

Dene mandi ka Pawülü fü wü kpara

ka Yesu agbü Tesalonika

¹ De-yi wü kpara ka Me, wü kpara ka *Miri Yesu Kurisito, te yi ngbü agbü Tesalonika, a ngbü eba köcökpa ne fü yi me-a, de-ra Pawülü, bete Sila,* ake Timoteyo. Kpara to mandi fü yi fa sü. Me di de yi, da eto gu ngü ka-ye fü yi de *züka maguma ye.

Dene ngü te ngbü eto tadu emaguma a, teka ngü ka-yi

² Wü di enga wüna, a ngbü egbo nga iri Me, teka ngü ka-yi, gbü wü sikipi 'buru. ³ Kükürü de, angü a wu, gü ba, yi ngbü emere ngü te ereke areke gbü jia Miri Yesu, angü yi to maguma yi eyi fefe fanü fanü. Kpah bala, yi ngbü eto te-yi teka ale ta-ngü te wü bu yi, angü yi le Miri Yesu eyi de maguma yi 'buru. Fü yi arü kpekpeke, angü yi ngbü eo jia yi teka dudu ka Yesu Kurisito. Te di bala, züka ngü ka-yi la, Me wu eyi 'buru.

⁴ Wü di enga wüna, a ngbü egbo nga iri Me, teka ne de, angü a wu eyi kpo, gü ba, Me le

* **1:1** 1:1 Iri de Sila, ah de Silivanü, wüh ngbü ei iri la mba piti bala.

ngü ka-yi fa sü, fü engu afe yi, ao wü di ye tete. ⁵ Angü ta te a koro teka amala ngü ka Yesu Kurisito fü yi agbü Tesalonika kpala ne, *Nzila Wazi Me to ta wazi fü a me-ye, de a di emala ngü la di kpekpeke. Fü Nzila Wazi Me adu kpah ato wazi la fü yi, teka fü yi awu, gü ba, ngü ka Yesu Kurisito la de zu ngü ka Me fanü fanü. Wazi te Nzila Wazi Me to fü a la, yi wu cu de jia yi, angü, ta te a ngbü esüka yi kpala ne, a kpe cürü nda-a de, a rü fi bü kpekpeke, teka amala ngari Miri Yesu fü yi. ⁶ Ta te yi wu bala ne, fü yi ayia amere kpah ba nda-a la. Angü yi rü kpah kpekpeke, baka a, kpah baka Miri ka-nih, Yesu Kurisito. Angü te wü bu yi ngbü ta eto mere kuru te yi tete, yi kpe cürü kpo de. Fü yi angbü kpah fi bü da ele ngü ka Me gömö a de mere tadu, teka ne de, angü Nzila Wazi Me ngbü eto wazi la fü yi cu me-ye.

⁷ Dela si-ngü de enatikine, te iri yi wü tete gbü wü sü ka Makedoniya, bete sü ka Akaya† zalü nde 'buru ne, angü yi zoro ngü engu la ta de kpa yi 'basu mini, fü yi adu arü kpekpeke. Angü wü kpara ka Me gbü wü sü la je wü ngü ta te yi mere dela eyi 'buru, fü ewü ale arü kpah kpekpeke baka yi la. ⁸ Te di bala, ngü ka Me wü eyi gbü nga nzö sü ne le 'buru, koro eyi zalü kpa gbü gara wü sü nengete, teka ngü ka-yi la. Amba a mala ngü la fü ewü nda-a de, ⁹ wü kpara ngbü ebaya ngü la esüka wü de tete-wü, gü ba dene, “Te a koro kpaka yi, yi le ngü ka Miri

† 1:7 1:7 Enatikine gbü wü sikipi dene, wüh ngbü ei sü ka Makedoniya bete sü ka Akaya 'buru tö ka wü Giriki.

Yesu gömö a de maguma yi 'buru. Angü yi ce gele ka wü me ka wü kundu yi eyi, fü yi adu afü maguma yi, akoro tîne, alala eküte ngü ka Mere Me, te di kpa gbü kpî. ¹⁰ Fû yi adu tîne, angbü eo jia yi gbü nga Yesu *Kurisito, Ye Me, te ena ayia agbü kpî, adu akoro fûh kotö sene." Angü yi wu eyi, ga, Me zükü Yesu gbü kpi eyi. Te gara, kpa engagira nü kpala, gbü *adu sikipî te Me ena ato kuru fû siti wü kpara tete, Yesu ena aküwa nih gbü siti kuru la me-ye.

Dela si-ngü de te a ba köcökpa ne fü yi tete, teka nga ngü ka-yi, te wü gara kpara ngbü emala fü a. Fû a aje ngü la de mere tadu.

2

¹ Wü di enga wüna, wü vügü ka-a ladü, te ewü ngbü emala ambala'ba, gü ba, "A de wü töndö kpara, te a koro teka afiti yi." Amba yi wu eyi, gü ba, wü vügü la ngbü esutu wu, angü a ngbü ta esüka yi kpala, ba züka wü kpara, te ngbü emala zu ngari Me fü yi. ² Yi wu wü ngü te mere a, ta te a koro tete kpaka yi ne, kpo. Angü te a di ta agbü Filïpoyi, o a koro kpaka yi la de ne, wü kpara ka Filïpoyi to ta mere cinga te a, da efala a, fü a ayia akoro kpaka yi agbü Tesalonika de kpala, de mere kuru te a.* Wü gara kpara kpa gba yi kpala le ta kpah aliki a. Te di bala, ah kpe cürü ta nda-a de. Angü Me to wazi fü a, fü a ayia ai maguma a, teka amala ngari Yesu fü yi.

³ Wü vügü ka-a ga, a de wü kpara te a koro de mani, teka afiti yi, amala siti rîrî fü yi, ato yi te

* **2:2** 2:2 Ngü te mere wü Pawülü gbü Filïpoyi, yi ena amaka gbü Mürü Tima 16.

kaje ka *siti ngü. Amba ah bala nda de. ⁴ Ngü te a mala fü yi, ah de zu ngari Me fanü fanü. Angü Me fe a cu me-ye, ayia atima a teka amala ngari ni fü wü kpara. Te di bala, a fi ngü ka wü kpara nda-a de. A ngbü efi nda-a nga Me, teka areke gbü jijia, angü engu wu fingangü ka-a 'buru kpo. ⁵ Fingangü ka-yi gü neh fe? Baka ta te a koro kpaka yi ne, a mala ta türü ngü, afiti yi di, de yi di eto jiasse fü a? Ah bala de. Me ladü te wu ngü la kpah eyi cu me-ye. ⁶ Baka ta te a koro kpaka yi ne, a koro ta baka wü cögbörö kpara, te wüh ena adi ecu ngü a acu? Ah bala de. Wü di enga wüna, yi wu ngbü rü kpo, ga, Yesu *Kurisito to wazi fü a me-ye, ba wü *mürü tima ka-ye. Amba a to riri fü yi kpekpeke, baka wü cögbörö kpara, nda-a de. ⁷ A ngbü erü yi ferrre, baka würüse te ngbü erü wü di enga ye. ⁸ Wü di enga wüna, gümü yi ngbü emere a efa sü. Dela si-ngü te a to te-a di 'buru teka amala ngari Me fü yi, de mere kuru la te a, angü a le yi fa sü. ⁹ De ta te a ngbü emala ngü ka Me fü yi tete ne, a yi-ta yi ta eyi, teka de yi to wü e fü a? A mere bala nda-a de. Angü yi wu ta kpah bü kpo, ga, a ngbü ta embü da emere tima de ra, de biti nde, teka amaka mba jiasse, adi ese e-mazü di ne, cu de kpa a.

¹⁰ Wü di enga wüna, yi wu ta wü ngü ka-a, te a ngbü emere kpa esüka yi la, cu de jia yi. A ngbü ta emere siti ngü? Ah bala de. A ngbü ta ba züka wü kpara. A ngbü ka-a ta emere fi bü züka ngü, te reke areke gbü jia Me. Me ladü te wu ngü la kpah 'buru kpo. ¹¹⁻¹² Angü a ngbü ta erü yi biri biri 'buru, baka kpara te ngbü erü wü di ye. A

ngbü ta erī yi ferrre, da eto wazi fū yi, de yi di ei maguma yi ai. Fū a angbü kpah emala ngü fū yi kpekpeke, teka de yi di enü 'be 'be 'be, fū yi akoro ba zūka wü kpara gbü jia Me. Angü Me ī yi dela me-ye, de yi di ba wü kpara ka-ni, de maguma yi lofo, fū yi angbü de wü ni, Me, kpa gbü kpī kpala de mere tadu.

¹³ Wü di engā wūna, a ngbü egbo ngā irī Me teka ngü ka-yi, gbü wü sikpī 'buru. Teka ne de, angü, de ta te yi je ngari Me gömō a ne, fū yi ayia 'duwa, ale ngü la. Yi le ngü la cu de maguma yi biringbö, angü yi wu kpo, ga, ngü engu la, ah de zu ngü ka Me, te engu tima fū yi me-ye. Ah de kükürü ngü ka-a, te a mala de tete-a ne, nda de. Ngü engu la, ah de zu ngü ka Me fanü fanü, te ngbü eto wazi fū yi. ¹⁴ Fanü fanü, ngü ka Me la ngbü fi bü da eto wazi fū yi, angü te wü bu yi ngbü eto cinga te yi la, a wu eyi, ga, yi ngbü erü ka-yi fi bü kpekpeke. Ngü ka-yi la, ah gegege ba ngü, de te wü *kpara ka Yesu Kurisito mere agbü *Yudaya. Teka ne de, angü wüh rü kpekpeke, te wü bu wü, wü di engā *Yisarayeles, ngbü eto cinga te ewü tete ne. ¹⁵⁻¹⁶ Angü wü di engā Yisarayeles la ngbü fi bü da emere *siti ngü gbü jia Me. Wüh kpah de wü kpara, te ewü mörö Miri Yesu. Ta gügü, wüh ngbü mörö wü *mürü dofo kpah bala. De-ra, te ma di kpah de engā Yisarayeles ne, wüh le ngü ka-ra nda-wü kpah de. Fū ewü ayia aliki a agbü Tesalonika kpala asidi. Wüh le de a mala ngari Yesu fū nguwa wü *ganzi kpara, baka yi ne, nda-wü de. Wüh le de Me küwa nguwa gara wü kpara kpah de. Angü wüh ka-wü de vügü ka

nguwa wü gara kpara, füh kotö ne 'buru. Amba ngü de te ewü ngbü emere la, ah reke te Me nda de. Ah ngbü gbü jijia na esiti 'duwa ba-neh-ene-la. Wüh lala ka-wü fi bü gbü siti ngü ka-wü la, wüh le ace nda-wü de. Teka ngü la, fü maguma Me angbü enzu eküte ewü. Te di bala, sïkpï te Me ena ato kuru te ewü tete eyi gbmari.

Dene kpah gara ngü te to tadu emaguma a,

angü yi lala fi bü gbü ngü ka Yesu Kurisito

¹⁷ Wü di enga wüna, gümü yi ngbü eke a efa sü. Baka ta te wüh liki a kpaka yi agbü Tesalonika de kpala ne, fü a anü angbü nengete, kpara du wu te-a de wü yi de. A ngbü kpakine kpah fi bü da efi nga yi. Teka ngü la, nga a yiri de, fü a akpo da egiri kaje, teka adu kpaka yi kpala. Amba a giri kaje la ma. ¹⁸ Kpah cu de-ra Pawülü, ma giri kaje de ma du kpaka yi kpala bi ma, angü *Satana ni kaje la fere eyi. ¹⁹⁻²⁰ Gümü yi ngbü emere a kükürü de, angü yi de züka wü kpara ka-a, te yi to tadu fü a fa sü. Angü, baka te yi je ngü ka Me gömö a, fü yi adu arü kpekpeke gbü ngü la ne, te di bala, gbü sïkpï te Miri Yesu ena adu akoro tete, engu ena agbo nga iri a teka ngü ka-yi la. Teka ngü la, fü a angbü eo jia a fi bü teka sïkpï la.

3

¹⁻² Teka ngü la, a ngbü fi bü efi nga yi de mere bi sïkpï. Angü gümü yi ngbü eke a 'duwa ba-neh-ene-la. Fü a aga dene, te ah tine eyi bala, ah le de a tima Timoteyo kpaka yi kpala, de ah to wazi fü yi, teka de yi i maguma yi, arü kpekpeke.

Teka ne de, angü Timoteyo de züka kpara, te mere tima ka Me kpekpeke. A ga, te a ngbü gbü Atenayî sene kpikpî a la, ah mere e de. Timoteyo nü enü kpaka yi kpala, de ah to wazi fü yi agbü Tesalonika la. ³⁻⁴ Angü yi ena ace ngü ka Me, teka cinga, te wüh ngbü eto eküte yi la. Angü ma mala ngü la ta eyi fü yi, ga, "Te yi le ngü ka Yesu eyi la, wü kpara ena ato kuru te yi ato." Titine ngü la koro eyi fanü. Angü Me ngbü eto cinga fü nih, wü kpara ka-ye, teka are maguma nih di. De te di eyi bala ne, ah le de yi rü arü kpekpeke gbü ngü la. ⁵ Dela si-ngü de te ma tima Timoteyo kpaka yi tete na ne, ah dela. Angü ma ngbü efi nga yi efa sü. Ma wu de, anga *Satana fiti yi dene eyi, teka de yi ce ngü ka Me, ka ngü ka kuru la? Te ah bala, amba mere züka tima, te a mere teka amala ngari Me fü yi ne, ah ena angbü kükürü. Fü ra ayia atima Timoteyo tüngü la, teka de ah nü, ah ceka yi, de ah du, ah mala nga yi fere.

⁶ Amba titine, baka te Timoteyo du koro, amala nga yi fü a ne, ma ngbü de mere tadu te ra fa sü. Angü ah gü ba dene, "Yi ngbü fi bü elala gbü nga Miri Yesu. Fü yi angbü ele te-yi de wü bu yi. Kpah bala, yi ngbü da efi nga a efa sü, baka e te kpara ngbü sene kpah efi nga yi ne." ⁷ Ngü ka-yi la ngbü eto wazi fü a, gbü mere cinga te ngbü kpah emere a de kpakine ne. ⁸ Fü maguma a adu agu, teka ngü ka-yi de te a je, ga, "Angü yi zoro lô Miri Yesu eyi de kpa yi 'basu ne."

⁹ Wü di enga wüna, ngü de te yi ngbü emere de kpala ne, ah ngbü eto tadu te a efa sü. Teka ngü la, kpara gbo nga iri Me tine eyi cu fa sü de maguma a 'buru, teka te a je nga yi de bala.

¹⁰ A ngbü kpah eku gba fü Me teka yi, de ra de biti, da enda'ba te-a fefe, de ah ü kaje fü a, de a lügü nga a, du koro kpaka yi kpala, teka ari yi de züka riri. Angü wü gara du riri ka Me ladü, te ma ri yi di la de.

¹¹ Dela gba ka-a, te a ngbü eku fü Wö nih Me, kpah fü Miri Yesu, teka de wüh ü kaje fü a, de a du koro kpaka yi kpala. ¹² Miri Yesu di de yi, da eto wazi fü yi, de yi di ele te-yi di esüka yi, de maguma yi biringbö, kpah baka e te a ngbü ele yi ne. Fü yi ale wü kpara kpah 'buru ba e la, anü de ngü la kpa engagira nü. ¹³ Te di bala, ah le de Miri Yesu to wazi fü yi, teka fü yi ace wü *siti ngü ka-yi le 'buru, adu angbü emere wü ngü te ngbü ereke gbü jijia. Te ah bala, te gara, gbü sikipi te Miri Yesu ena adu akoro tete na, de wü *malayika ka-ye zalü 'buru nde, yi ena arü engagira Wö nih Me, de mere tadu, angü yi eyi de züka wü kpara kaka fanü fanü.

4

Dene ngü te ena areke gbü jia Me

¹⁻² Wü di enga wüna, nih 'buru nde wü kpara ka Miri Yesu. Te di bala, a ngbü emala fü yi kpekpeke, ga, “Yi di emere fi bü züka ngü, te reke areke gbü jia Me.” Angü yi je ngü la eyi gömö a, ta te a ngbü esüka yi kpala ne. Te di bala, ah le de yi nü de ngü la fi bü kpa engagira nü.

³ Wü di enga wüna, Me ngbü ele de yi di engbü ba züka wü kpara ka-ni, *nzila. Te di bala, yi mere e angbü emere waza de. ⁴ Ah le de mü

di engbü bü nzö de wara mü biringbö, de züka fingangü. De mü di emere ngü fefe ereke areke, angü Me to engu fü mü me-ye. ⁵ Wü kpara te ewü le ngü ka Me de ne, wüh ngbü emere ngü ba e te ewü le. Wüh fi nga wara wü baka kpara de, wüh le ewü nzö wü rüse tete. Gara ewü ngbü eza wü rüse nzö teka abī mere bi wü jaji. Amba nda-yi, yi mere e amere ngü baka nda-ewü la de, angü yi de wü kpara ka Me. ⁶ A mala ta ngü la eyi fü yi kpekpeke, gü ba, “Te mü ngbü de wü rüse te di de wara mü de, mü baka mürü zi te ngbü ezi e ka wü bu ye.” Dela ngü te Me le 'duwa kpo fi de, furu afuru. Te mü ngbü emere ngü de bala, Me ena ato mere siti kuru fü mü fanü fanü. ⁷ Angü ngü ka waza siti gbü jia Me 'duwa ba-neh-ene-la. Me ngbü ele de wü kpara ka-ni di engbü nzila, adi emere bü duu züka ngü gbü jia ni. ⁸ Dela si-ngü de te engu to *Nzila Wazi ye tete fü yi, teka de yi di engbü nzila. Te ah bala, ah le de yi je riri ka-a ne reke areke. Teka ne de, angü ah de riri ka Me, ah baka gele ka koti nda de. Te di bala, te mü le ngü la de, Me ena ato kuru fü mü ato.

⁹⁻¹⁰ Dene e'ba'basu ngü te a le amala fü yi, ah de ngü ka le-te. A wu kpo, ga, yi ngbü ele te-yi de wü bu yi, wü *kpara ka Yesu, ale fanü fanü. Angü yi kpo de ngü la eyi gügü, angü Me gü tamu ngü la eyi fü yi. Fü yi angbü ele te-yi de wü kpara ka Yesu 'buru gbü sü ka-yi, agbü Makedoniya de kpala ne, ale. Wü di enga wüna, a ngbü emala fü yi kpekpeke, ga, “Yi nü de wü ngü la fi bü kpa engagira nü.”

¹¹⁻¹² Ah le kpah de yi di eo maguma yi teka

angbü ziii. Yi mere e adi ekpülü wü bu yi de. Yi di emere tima de kpa yi, teka fü yi adi emaka e-mazü, te ena atı teka yi, kpah baka e te a mala fü yi tane. Te yi ngbü emere wü ngü la bala, wü kpara te ewü le ngü ka Yesu de ne, wüh ena awu, ga, yi de kpeke wü kpara.

Dene ngü teka dudu ka Miri Yesu, füh kotö ne

¹³ Wü di enga wüna, ma le amala ngü fü yi teka ngü ka wü kpara ka Me, te ewü kpi eyi ne. Te gara, Me ena azükü ewü azükü gbü kpi la. Wü kpara te ewü le ngü ka Me de ne, wüh ti awu ngü la bala nda-wü de. Fü ewü adi engbü de mere siti cinga, da eku mere gba, teka ngü la. Yi mere e adi engbü de mere cinga, baka nda-ewü la, de.

¹⁴ Angü nih wu eyi, gü ba, Yesu kpi ta akpi, fü ah adu azükü. Kpah bala, Me ena azükü wü kpara ka-ye, te ewü to maguma wü fü Yesu, te ewü kpi eyi akpi ne, aza ewü kpaka ye agbü kpi kpala, gbü sikipi te Yesu ena adu akoro tete.

¹⁵ Ngü de te ma emala fü yi ne, ah de kpeke ngü. Ah de ngü te Miri Yesu mala me-ye. Angü engu mala ngü la, gü ba dene, “Gbü sikipi te ni ena adu akoro tete, wü kpara ka-ni te ewü kpi eyi akpi ne, ni ti ace ewü de.” Angü wüh ena ayia fi me-wü. ¹⁶ Angü gbü sikipi la, Miri Yesu ena ayia agbü kpi kpala, adu akoro. Fü wü kpara aje ri mere *malayika, de kono ka Me mini, teka abiti wü kpara ka Yesu Kurisito 'buru. Fü Miri Yesu ayia ai wü kpara ka-ye de mere ri ye. Fü wü kpara kaka te ewü kpi akpi ne, fü ewü ayia azükü fi me-wü, de to küte wü mini.

¹⁷ Fütanga ngü la, Me ena aza nih de ezükü ne,

fü nih ayia 'buru de ewü, teka fü nih anü amaka te-nih de wü Miri Yesu kpa tikpi kpala. Fü nih angbü de wü Miri Yesu, fi mere badi.

¹⁸ Te di bala, wü di enga wüna, te cinga te emere yi teka wü bu yi, te ewü kpi akpi ne la, yi di efi nga wü ngü de te ma mala fü yi ne, adi emala esüka yi, teka fü maguma yi adi egu gbü ngü la.

5

¹⁻² Wü di enga wüna, yi wu kpah bü kpo, ga, kpapa biringbö, te wu sikipi te Miri Yesu ena adu akoro tete na, ah nda ma. Te di bala, a ti amala nga sikipi la fü yi nda-a kpah de. Angü sikipi engu la ena ata wü kpapa ata. Ah ena adi gegege baka mürü zi te ngbü ekoro gbü biti, agüka wü kpapa da era ara. ³ Gbü sikipi engu la, wü kpapa te ewü le ngü ka Me de, wüh ena agüka agüka. Angü wüh ngbü efi, gü ba dene, "Ani ngbü engbü ka-ani gbü züka gu sü ne zözö. Me wu ngü ka-ani nda de, ah ti ato kuru fü ani kpah de." Te gara wüh ga, ani ceka kpi bane de, gbangbara! Miri Yesu koro eyi, teka ato kuru te ewü! Ngü la ena agüka ewü gegege baka e te keke ka yayaka ngbü egüka würüse de bu ye. Wüh ti aküwa de, angü da ewü teka afü maguma ewü nda tîne eyi ma.

⁴ Wü di enga wüna, yi de wü kpapa ka biti baka ewü nda-yi de. Te ah bala, sikipi ka Miri Yesu ti agüka yi agüka baka ewü de, angü yi ngbü eo jia yi teka sikipi la. ⁵ Nih ka-nih nda-nih wü kpapa ka ra-sü, angü Me lofo jia nih eyi. Nih ti adu angbü gbü biti nda-nih tîne de.

⁶ Wü di engä wüna, de te nih di ka-nih nda-nih wü kpara ka ra-sü ne, nih ceka te-nih mbi, da etüka te-nih, gbü wü re-ngü ka *Satana. Nih o fingangü ka-nih, teka amere wü ngü, te ena areke gbü jia Me. Nih mere e adu gbü ngü ka biti, baka wü bu nih ne, de. ⁷ Angü wü bu nih la, wüh ka-wü de wü kpara ka biti, jia ewü nda ma. Wü kpara te ewü ele adi era ara ne, wüh ngbü era nda-wü gbü biti. Wü kpara te ewü le adi enzö fi ne, wüh ngbü enzö fi kpah gbü biti, da eküya di. ⁸ Amba nih mere e amere bala de, angü nih de wü kpara ka biti nda-nih de. Nih ka-nih nda-nih wü kpara ka ra-sü. Te di bala, ah le de nih ceka te-nih mbi, teka adi emere wü ngü te ena areke gbü jia Me. Nih ena amaka wazi, teka adi emere wü züka ngü di, neh kaye? Ah le fü Miri Yesu ato wazi fü nih me-ye. Te ah bala, nih to maguma nih fü Miri Yesu, da ele Miri Yesu de maguma nih 'buru, da eo jia nih teka sïkpï ka dudu kaka. Tekä ne de, angü nih wu eyi kpo, ga, Miri Yesu ena aküwa nih gbü sïkpï la. ⁹ Nih ena aküwa fanü fanü, angü nih 'buru wü kpara te Me fe nih eyi, ao ba züka wü kpara ka Miri Yesu. Te ah bala la, Me ena adu ato kuru te nih, neh baye baye? Me ena aküwa nih aküwa, angü nih de wü kpara ka Miri Yesu Kurisito fanü. ¹⁰ Angü Miri Yesu to te-ye akpi teka nih, te nih di de wü kpara kaka-na ne. Miri Yesu ena adu abiti nih, gbü sïkpï te engu ena adu akoro tete na. Anga ah ena adu akoro amaka nih ezükü, anga o nih kpi eyi la, engu ena abiti nih, fü nih angbü de ewü fi mere badi.

¹¹ Te di eyi bala ne, wü di engä wüna, te cingä

ngbü emere yi, de yi di emala wü ngü la esüka yi, da eto wazi fü wü bu yi, teka fü yi arü kpekpeke, baka e te yi ngbü emere, zalü akoro di enatikine ne.

Dene adu riri, te a ngbü eto fü yi

¹²⁻¹³ Wü di enga wüna, ah le de yi di emere wü ngü de te reke areke gbü jia Me. Tekä ngü ka wü *kovo te Me o ewü, de wüh ngbü gbü nzö yi, da erī yi de ngü ka Me ne, ah le de yi di eje ngü ka-ewü, da ecu ngü ewü. Yi di kpah ele ta-ngü te ewü. Tekä ne de, angü wüh ngbü emere tima kpekpeke 'duwa ba-neh-ene-la teka yi. Yi mere e angbü ega yiki esüka yi de ewü ne de.

¹⁴ Te ena adi teka wü bu yi la, yi mere e adi ewü nga fü ewü kpah de. Te wü gara ewü di de wü mürü cürü la, yi mala züka ngü fü ewü, de wüh rü kpekpeke. Te wazi ewü ma, de yi di ele ta-ngü te ewü. Te wüh di kpah de mürü basa la, yi di erī ewü mba kpekpeke de wüh ce ngü la. Yi ngbü de züka maguma, da emala ngü fü wü kpara 'buru de gu maguma yi. ¹⁵ Tekä mene wü kpara, te ewü ngbü emere siti ngü eküte yi, yi mere e alügü siti ngü la fü ewü tine de. Yi di elügü fü ewü fi bü züka ngü. Kpah bala, yi di fi bü emere züka ngü fü wü bu yi, wü *kpara ka Yesu, kpah de gara wü kpara 'buru nde.

¹⁶⁻¹⁸ Wü di enga wüna, ah le de yi ngbü da egbo nga iri Me gbü wü ngü ka-yi 'buru. Te ah di de züka ngü, anga te ena adi kpah de cinga la, yi mere e ace da egbo nga iri Me de. Te yi ngbü emere bala, yi ena angbü de tadu emaguma yi. Yi di kpah eku gba fü Me de ra de biti 'buru. Te

fingangü ka-yi ngbü bala, dela ngü te ena areke gbü jia Me. Angü dela ngü te Me ngbü ele, ga, wü kpara ka Yesu Kurisito di emere bala.

¹⁹ Te *Nzila Wazi Me ngbü eyi erī yi emaguma yi la, yi je 'duwa ngü kaka-na. ²⁰ Te Nzila Wazi Me mala ngü fü yi gömö wü bu yi la, yi mere e ace ngü la kpah de. ²¹ Te gara kpara ena akpo da eto riri fü yi de iri Nzila Wazi Me la, yi di eceka kpi gbü ngü engu la kpo kpo kpo feke. Te yi wu eyi, gü ba, ah de zu ngü ka Me fanü fanü la, de yi le ngü kaka de maguma yi 'buru. ²² Te ah ka-ye nda de siti riri la, de yi ce ace asidi.

²³ Wü di enga wüna, Me di de yi, da eto züka ngbüngbü zözö, de gu maguma fü yi. Me di eto wazi fü yi gbü wü sikpi 'buru, de yi ngbü fi bü da emere wü ngü, te ena areke gbü jijia na. Me ceka kpi fütanga küte yi, de fingangü ka-yi, bete maguma yi zalü nde 'buru, teka de yi ngbü mbi, angü yi ena amere *siti ngü. Te di bala, Miri Yesu ti eyi amaka yi baka züka wü kpara ka-ye, gbü sikpi te engu ena adu akoro tete na. ²⁴ Angü Me fe yi, de yi ngbü ba wü di ni, cu me-ye. Tekä ngü la, engu ena ato wazi fü yi bala fanü fanü, angü ngü te engu mala, ah ti ace de.

²⁵ Wü di enga wüna, yi ku gba fü Me teka a.

²⁶ Yi to mandi ka-a fü wü di enga ni nih kpala 'buru, de mere lele fa sü.

²⁷ Ma mala fü yi de iri Miri ka-nih, Yesu Kurisito, ga, "Yi i wü bu yi, wü kpara ka Me, de yi tanga köcökpa ne fü ewü zalü nde 'buru."

²⁸ Miri Yesu Kurisito ngbü de yi, da eto wazi fü yi, de *züka maguma ye.

Dela adu ngü te ma mala fü yi, de-ra Pawülü.

**To Ngü Mürü ka Me bete Gina Ngü (S Sudan)
Mündü: To Ngü Mürü ka Me bete Gina Ngü (S
Sudan) New Testament+**

copyright © 2005 Wycliffe Bible Translators, Inc.

Language: (Mündü)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

9787304f-bc80-5421-9b63-c767eb819b6f